

**IPF Yakin PM Akan Iktiraf Sokongan Parti Selama 22 Tahun, Kata Sambanthan Bernama
18 Mei, 2013**

PUTRAJAYA, 18 Mei (Bernama)-- Barisan Kemajuan India Se-Malaysia (IPF), yakin Perdana Menteri Datuk Seri Najib Tun Razak akan memberi pengiktirafan sewajarnya terhadap sumbangan dan sokongan parti itu atas kemenangan Barisan Nasional (BN) pada Pilihan Raya Umum ke-13 (PRU13), 5 Mei lepas.

Presidennya Datuk M. Sambanthan berkata Najib, yang menyemai semangat 'Nambikkai' (kepercayaan), tetap akan menunaikan Aku Janji BN terhadap parti penyokong setia BN itu.

"Walaupun tiada wakil IPF dalam barisan baharu Kabinet Persekutuan, namun kami yakin Perdana Menteri tetap mempunyai sesuatu (jawatan) untuk kita," katanya kepada Bernama di sini Sabtu.

Sambanthan berkata parti yang diasaskan mendiang Tan Sri M. G Pandithan pada 1990, setia bersama BN selama 22 tahun dan membuktikan sokongan tidak berbelah bahagi atas segala dasar dan usaha kerajaan menjadikan negara maju menjelang 2020.

Sebagai sumbangan dan pengiktirafan parti itu terhadap BN, mendiang Pandithan pernah dilantik sebagai Senator pada 1995 oleh bekas perdana menteri Tun Dr Mahathir Mohamad.

Namun, selepas Pandithan meninggal dunia pada 29 Mei 2008, belum ada pemimpin dari IPF dilantik untuk jawatan tertinggi dalam kerajaan.

Justeru, anak didik Pandithan itu yakin pengisian jawatan dalam kerajaan akan menguatkan lagi kedudukan dan imej parti itu.

Selain itu, katanya, ia akan menyuntik semangat kepada 135,000 anggota parti itu untuk terus bekerja kuat terutamanya bagi menarik lebih ramai belia India menyokong kerajaan BN.

Menyentuh pelantikan Pengerusi Hindraf P. Waythamoorthy sebagai Timbalan Menteri di Jabatan Perdana Menteri, Sambanthan berkata beliau menghormati keputusan Perdana Menteri dalam usaha menyatupadukan masyarakat India.

"Tidak wajar kita pertikaikan keputusan PM, beliau (Najib) mesti ada alasan kukuh atas pelantikan tersebut, sebab suatu ketika dahulu Waythamoorthy pernah menentang kerajaan," katanya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=950587>